

De Bersn

Palaier ont vlarotzer hoasn me “de Bersn”,
ver de oachlaiter pin “de Versn”.

I toal o s tol en zboa saitn,
ober òlla de glocken hear i laitn.

I pin lai an kloa'n pòch,
ober lisn, gib mer òcht!
Van Hardimbl sea gea i au,
gea auer ont schau!

Ail, pahènn, i muas gea,
i hòn òlbe vil za tea'!
I mòch gea' de reider va der mil,
asou ver de lait mel hòt s vil!

Ont a'ne bòsser van pòch,
mòchst du nèt au s dòch!
Pet n mai' bòsser geat de sog, asou hòt s vleck
ont de haiser van Bersntol kònt men decken.

Za trinken gib i en òlla de lait,
gor en de vischler s mai' bòsser gíbt vrait.
En mai' bòsser en summer de kinder spiln
ont pet de klòtt n as de baiber baschn do, kinnen se se òlla mi'n.

Òlla de talalar prengen mer s bòsser zua
asou òlla de lait hom bòsser ganua.
En Kaneitsch hom sa iaz gamòcht an sea,
asou de kinder za schwimmen kinnen gea'.

Giatla giatla finz en Trea't gea i
ont zòmmen en de Etsch mischn tua me i!
S bòsser van Hardimblsea
tuat asou finz en meir gea'!

S Hardimbl seabl

Doum mittlt de pèrg, as 2000 metre ont mear,
do bou as tsetzt en a rua plaibst abia an hear,
hòt s a kloas seabl abia a hèrzt gamòcht
ont en dai' kummer gibst do nea'mer òcht!

Binter ont summer geat nia vort der schnea
òlla de lait as vir gea' vinnen òlls s doi' runt schea'!
En sai' bòsser spiageln se de pèrg pan to,
pa der nòcht òlla de stern kònnst du drinn sechen do!

En langes hòt s plea'mbler va hundred vòrm,
do auer aa heivs u' za kemmen bòrm.
A ker as de vòrt zergeat se der schnea
ont s bòsser mòcht bòcksn asou gor en sea.

Van Hardimblsea geat au gor de Bersn
as geat abaus finz en Persn
ont en tol gib se gor en nu'm
ont bòsser ver de eart ont ver en su'm.

Men de billst der schenken an schea'n to,
der Hardimblsea sogt der: "Gea auer do,
gea ont schau s gònz Bersntol aa,
gabiss barst du umkearn an ònders vòrt aa!"